

Uunga siunnersuut: Sulisitsisup sulineramik inuussutissarsiuteqartumik atorfeqarnermi atugassarititaasut pillugit ilisimatitsisussaananut Inatsisartut inatsisaat (atorfeqarnermut uppersaasarnermut inatsit)

(Isumaginninnermut, Suliffeqarnermut Nunamullu Namminermut Naalakkersuisoq)

Saqqummiussinermut allakkiaq

(Isumaginninnermut, Suliffeqarnermut Nunamullu Namminermut Naalakkersuisoq) (**Siullermeerinnineq**)

Sulisitsisup sulineramik inuussutissarsiuteqartumik atorfeqarnermi atugassarititaasut pillugit ilisimatitsisussaananut Inatsisartut inatsisissaattut siunnersuut una siunertaqarpoq qularnaarinissamik sulineramik inuussutissarsiuteqartut paasissutissinneqartarnissaannik uppersaatinillu tunineqartarnissaannik atorfeqarnerminnut atatillugu pissutsini pingaaruteqartuni.

Inatsisartut inatsisaat kinguneqassaaq pisussaaffeqarnermik sulineramik inuussutissarsiuteqartut tamangajammik sulisitsisuini, allaganngorlugit sulineramik inuussutissarsiuteqartunut paasissutissiisarnissamik atorfeqartarnermut atatillugu atugassarititaasunut pingaaruteqartunik tamanik.

Tamatumanilu aamma siunnersuutigineqarpoq siunissami sulineramik inuussutissarsiuteqartut paasissutissinneqartarnissaannik, ilaatigut makkunuuna:

Sulisitsisup aamma sulineramik inuussutissarsiuteqartup atiinik aamma najugaanik, suliassat sumi sularineqartarnerannut nalunaarsuummik, atorfeqartitaanerup qanga aallartinneranik, piffissamik suliffiusussamik nalinginnaasumik, akissarsiatigut atugassarititaasunik, sulineramik inuussutissarsiuteqartup pisinnaatitaaffiinik akiliunneqarluni sulinngiffeqartarnermi, soraarniarnermi soraarsitaanermilu siumut ilisimatitsisoqareertussaananik piffissalikkamik, najugarisap avataanut suliartortarnermi atugassarititaasunik il.il.

Inatsisartut inatsisaat atuutissaaq sulineramik inuussutissarsiuteqartunut apeqqutaatinnagu taanna pisortani imaluunniit namminersortut suliffiutaanni atorfeqarnersoq.

Inatsisartut inatsisaat toqqaannartumik sunniuteqassanngilaq atorfeqarnermut atatillugu isumaqatigiissutaasartunut namminernut, taamalu tunngaviatigut atorfeqarnermi atugassarititaasunut sunniuteqassanani. Inatsilli annertusisamik aqqutissiuussisaaq atorfeqarnermi atugassarititaasut pillugit paasissutissiisarnernut, taamalu “isortuussaasartut” akerleriissutaasut saqqummersissallugit, aatsaat illuatungeriit akerleriissuteqalernerisigut saqqummertaraluartut.

Siunnersuummi ilanngunneqarput piffissamut ikaarsaariarnermut atatillugu aalajangersakkat qularnaarumallugu sulisitsisut piffissaqartarnissaat atorfeqarnermut uppersaatinik sulisoreriikkaminnut allakkiornissanut.

Ukiuni arlaqalersuni politikikkut kissaatit saqqummiunneqartarpoq kissaatigineqartoq Kalaallit Nunaanni atorfinititsisarnermut inatsimmik eqqussisoqarnissaa. Inatsisiliornissamut aallarnisaataasut siusinnerusukkut Inatsisartuni oqaluuserineqartarsimapput. Suli suliassaqarfimmi tassani inatsisiliortoqanngilaq, naak ersarissunik takussutissaqaraluartoq pisariaqartitsisoqartoq.

Taamaattumik nuannaarutigaarput siunnersuut una Inatsisartut katersuunneranni matumani saqqummiussinnaagatsigu.

Taamatut Naalackersuisuniit oqaaseqarluta siunnersuut Inatsisartunut inussiarnersumik suliassanngortipparput.